

Wani Meitani'axia mexiakame xapayari

Niuki tukari tiyupitiwame hepaitsita

¹ Tita matiari paiti mitimieme, tita temite'u'eni, tita temite'uxei tahixiki, tita 'ahurawa temitexeiyakai, tita tamamaki temite'umayia, miki tekanixekuxaxatiwani niuki tukari tiyupitiwame hepaitsita.

² Tukari matsiikiti kanayani. Tame tekanixeiya, tekanihekiatani, meta tekatenixe'utaxatiani miki tukari mikaxiwe hepaitsita, miki yu'ukiyari kaniteitakaitini meta tepuxeitsitiarie tame.

³ Tita temite'uxei, tita temite'u'eni, miki tekanixekuxaxatiwani xemeta tanaiti temitaxewiniki. Ketemitetaxewi tame, ta'ukiyari hamatia tepitaxewi nu'aya hamatia meta Ketsutsi Kiritsitu hamatia tepitaxewi.

⁴ 'Ipai tekateniu'utiani maye'aniki tatemawierika.

Hekiarinya hetsie teke'uhuni

⁵ 'Ipai panuyine niuki hetsiana mimieme temi'eni meta temixekuxaxatiwa: Kakaiyari hekiarinya kanihikitini, yiriya pumawe hetsiena.

⁶ Xika yate'utiyuani kename hamatiana tetaxewi, yiwipa xika te'u'uwani, tepite'itawa, yuri yatepikatekahu.

⁷ Matsitsi hekiaripa xika te'u'uwani miki hekiaripa makawe hepai, tanaiti tekanitaxewikakuni, miki meta, Ketsutsi

Kakaiyari nu'aya xuriyaya naime 'axatemiteyurie katani'itirieka.

⁸ Xika yate'utiyuani kename tita 'axamiti'ane tekatehexeiya, takimana tepeutayexiriwa, tita yuri miraine tahetsie pumawe.

⁹ Mexika te'itahekata tita 'axatemite'uyuri, miki kemaine yapitikamie, kemitiheitserie yapitiyuriene, tita 'axatemite'uyuri pitareuyehiwirieni, katani'itirieka naime mikatiheitserie.

¹⁰ Xika yate'utiyuani kename 'axatekateyuriwawe, miki ti'itawame tekanayeitiwani, niukieya tahetsie pumawe.

2

Kiritsitu tahetsiemieme pitaniuni

¹ Neniwema 'iki nepixe'utirie 'axaxemikateyuriekaki. Mexika 'axatiuyurieni xewiti, tame tepeixeiya kemi'ane tahetsiemieme mitaniuni yu'ukiyari hixie, Ketsutsi Kiritsitu hikiti kemitiheitserie yamitiyuriene.

² Miki kanihikiti kemiane 'aixia mitiuyuri 'aixia temitexeyariekaki tame 'axatemiteyurie, tita tame temiteyuriei xeikia pika'uyi, matsi yunaiti kwiepa memitama wahetsiemieme puyi.

³ Xika yatetekahuni kemiti'aista, mipai tekatenimaika temeitimaki.

⁴ Kemi'ane ne nemeitima maine, yakatikamieti kemiti'aista, miki katini'itawani, tita yuri miraine hetsiena pumawe.

⁵ Kemi'ane yamitikamie miki niukieyatsie, yuriki miki kanaye'ani tiyukanaki'eriet Kakaiyari hepai. 'Ipai tekatenimaika hetsiena temitewiya.

⁶ Kemi'ane hetsiena tiwiyati 'emuyeika maine, kaneuyeweka hepaina miyianeni miki miyianekai hepai.

⁷ Nenaki'erima, hekwameki netixe'aitiati nepikatixe'utiirie, 'aitsika meripaiti kanimiemetini pita matiari paiti xemeixeiya. 'Iki 'aitsika meripaiti mimieme, niuki kanihikiti ni matiari paiti xemi'eni.

⁸ Peru 'apita, nekatixixe'utiirieka 'aitsiaka hekwame, tita yuri miraine Kiritsitu hetsie kanimatsiikini xehetsieta kanimatsiikini, yiriya makuyeiximeki, tita yuriki mitihekariya mihekariyakiri.

⁹ Kemi'ane hekiaripa muyeika maine, peru yu'iwa 'uxieti, miki yiwipa 'akuxi kaniuyeikani.

¹⁰ Kemi'ane yu'iwa minaki'erie hekiaripa kaniuweni, hetsiena pitumawe kimana metiketamireki.

¹¹ Kemi'ane yu'iwa mu'uxie yiwipa kaniuweni, meta yiwipa kaniuyeikani, 'atsipikatiimate kemitimie yiriya mekipiriyaki.

¹² Neniwema nepitixe'utiirie,
tita 'axaxemite'uyuri xemiteheuyehiwiyarieki
Kiritsitu hetsia xemimemeteki.

¹³ Xeme xemiwapaapama nepitixe'utiirie,
xemeitimaki miki tsutiapai 'amuyeika.

Temari nepitixe'utiirie,
xeme'iwaxiki 'axamitiyuriene.

Tiiri nepitixe'uta'utiiri,
yu'ukiyari xemetimaki.

¹⁴ Xeme xemiwapaapama nepitixe'uta'utiiri,
xemeitimaki miki tsutiapai 'amuyeika.

Temari nepitixe'uta'utiiri,

xemitirikawiki,
Kakaiyari niukieya xehetsie mitiwiyaiki,
meta 'axamitiyuriene xema'iwaxiki.

Kwiepa timieme xepikatenaki'erieka

¹⁵ Tita kwiepa mitimieme xepikatenaki'erieka, kepaimeiti kwiepa mitixuawe xepikatenaki'erieka. Tita kwiepa mitimieme xika tinaki'erieka, miki yu'ukiyari pikanaki'erie.

¹⁶ Kamitsi naiti kwiepa mitixuawe, —tewititi tita mitihiwe'erie, tita yihixiki mitihiwe'erie, yaki xeikia kemitiyukatawe'erie yupiini hepaitisita— miki ta'ukiyari hetsia pikatimieme, miki kwiepa pitimieme pita.

¹⁷ 'Iki kwie kanakuyeiximeni meta tita kwiepa memitama memitehiwe'erie kanakuyeiximeni, peru kemi'ane yamitikamie kemitinake Kakaiyari, miki kaniyuhayewani yuheyemeki.

*Kiritsitu memaye'unie wahepaitsita xekeneyuk-
weriwayurieka*

¹⁸ Neuxei türi, hiki tukari kanaye'aniri kepauka mitapare, kexemite'enanakai kename xewiti 'uhamie Kiritsitu 'aye'unieti, hikititiri yumireti Kiritsitu memaye'unie mekanixuaweni. 'Ayumieme tepitemate tukariri paye'a kepauka mitapare.

¹⁹ Tatsata mepayeki, matsiri tahetsia mepikamiemetetikai, xika tahetsia memieme-tetinike, tahamatia mepuyuhayewakeyu. Mekanayekinetsiari memimatsiikiniki tahetsia memikamiemeteki.

²⁰ Miki mipatsie heitserie kanixe'upitiani xeyu-naime, yunaiti xepitemate.

21 Nepikatiŋe'uti'utiiri tita yuri miraine xemikamateki, tita yuri miraine xemimateki pita nepitiŋe'uti'utiiri, naiti 'itarika tita yuri mirainetsie mika'ayeneikaki.

22 ¿Kepaiki piti'itawa? Kemi'ane miyuhekiata mipai 'utaiti kename Ketsutsi heitserie kahex-eiya Kiritsituti, miki katini'itawani. Kemi'ane miyuhekiata 'ukiyarieya kahexeyati meta nu'aya, miki Kiritsitu maye'unie kanihikiti.

23 Yunaiti nu'aya mekahexeyati memiyuhekiata, 'ukiyarieyata mepikahexeya. Kemi'ane miki nu'aya hexeyati muyuhekiata, mikita 'ukiyarieya kanexeyani.

24 Xeme tita xemite'u'eni tsutia paiti, xehetsie tiwiyati keyuhayewani, xika xehetsie tiwiyati 'uyuhayewa tita tsutia paiti xemite'u'eni, xemerita nu'ayatsie meta 'ukiyarieyatsie xetewiyati xekaniyuhayewakuni.

25 Tukari mikaxiwe kanihikiti tita miki mitatiutahiawixi temeixeiyani.

26 'Iki 'ipai nepitiŋe'u'utiiri memixeheuyexiriwa wahepaitsita.

27 Xemeru heitserie miki kemitiŋe'upitia, miki heitserie xemexeya xehetsie tiwiyati kaniyuhayewa, xeimeri xepikaheuyehiwa mitixeti'ikitiani. Miki heitserie xemupitarie miki hetsia mieme mitixeti'ikitia hepai naime hepaitsita, yuri maine, mikati'itawa, mitixeti'ikitia, mipai hetsiena xetewiyati xekeneyuhayewa.

Kakaiyari hetsie tetewiyati tepitahayewani

28 Hikitsiari neniwema hetsiena xetewiyati xekeneyuhayewa, xika mipai xeteyurieka, kepauka matsiikiti mayani miki, 'aixia tepitetamaika tekatatetewiyati hixiena kepauka munuani.

29 Xika xetemaika miki yamitiyuriene kemitiheitserie, yaxeketenemaikata yunaiti yamemiteyurie kemitiheitserie hetsiena mekaniyekine.

3

1 Neuxei ta'ukiyari ketatinaki'erie, mikiki Kakaiyari niwemama teputateriwarie, niwemama tepihiki. 'Ayumieme kwiepa memitama mepikatatsimate miki memikaheitimaiwawekaiki.

2 Nenaki'erima, hikititiri Kakaiyari tekaniniwemamatini, peru 'akuxi pikamatsiiki ketemi'aneneni. Mipai tepitemate, kepauka matsiikiti mayani Kiritsitu, miki kemi'ane, hepaina tepi'aneneni, tekaneixeyakuni miki kemi'ane.

3 Yunaiti mipai memite'ikwewie mepuyu'itie yikimana miki kemiti'itiya hepai.

4 Yunaiti 'axamemiteyurie 'aitsika mekan-ititsanani, tita 'axamiti'ane 'aitsika tsaname kanihikitini.

5 Xeme mipai xepitemate Ketsutsi Kiritsitu matsiikiti matiaki mitatsinawairieniki tita 'axatemiteyurie. Tita 'axamiti'ane pumawe hetsiena.

6 Yunaiti hetsiena memitewiya 'ax-amepikateyurie. Yunaiti 'axamemiteyurie mepika'ixeyawawe meta mepikaheitimaiwawe.

⁷ Neniwema xika tima xewiti kaxe-heuyexirienike. Kemi'ane yamitiyuriene kemitiheitserie, miki heitserie kanexeiyani miki heitserie mexeiya hepai.

⁸ Kemi'ane 'axamitiyuriene Kauyumarie hetsia kanimiemetini, Kauyumarie 'axamitiyurieneki tsutia paiti. Kakaiyari nu'aya 'ayumieme matsiikiti kanayani mita'unaki Kauyumarie tita mitiyuriene.

⁹ Yunaiti Kakaiyaritsie memiyeki 'axamepikateyurie miki 'imiarieya wahetsie miyekaki, 'axamemiteyurieni mepikayiwawe Kakaiyaritsie memiyekiki.

¹⁰ 'Ipai mepitematsiiki Kakaiyari niwemama meta Kauyumarie niwemama: Kemi'ane yamikatiyuriene kemitiheitserie meta kemi'ane yu'iwa mikanaki'erie, miki Kakaiyari pikanu'aya.

Xekeneyunaki'erieka yunaiti

¹¹ Mipai kanaineni niuki tsutia paiti xemi'eni: Tanaiti tepitanaki'erieka maine.

¹² Kahini hepai tepikayika, miki 'axamitiyuriene hetsia kanimiemetikaitini, yumuta kaniumieni. ¿Titayari timi? Tita mitiyurienekai 'axamiti'anekaiki, mutaya tita mitiyurienekai miheitseriekaiki.

¹³ Ne'iwama xepikahixiyaka xika kwiepa memitama mexe'uxieka.

¹⁴ Tame ta'iwamarixi temiwanaki'erieki 'ayumieme tepitemate temitapataxi tekamikititiri te'ayeneniereti pita. Kemi'ane mikatiyukanaki'erie mikiti 'apuyeika 'akuxi.

¹⁵ Yunaiti yu'iwama memiwa'uxie teyumemiwamete mekanihikitini, xeme xepitemate

tiyumemiwame yikimana tukari mikaxiwe pikahexeiya.

¹⁶ 'Ikiki tepeitima naki'eriya, Ketsutsi Kirititsu tahetsiemieme yutukari miyetuaki. Kaneuyeweka tameta ta'iwama wahetsiemieme tatukari temiyetواني.

¹⁷ Kemi'ane yupiini kwiepa timieme mirexeiya, mixeiya yu'iwa reuyehiakame, xika yu'iyari 'anunaka hepaitsitana, zkeri timatsiiki kename Kakaiyari naki'eriyaya hexeiya?

¹⁸ Neuxei neniwema, tepikatanaki'erieka niukiki xeikia yaki xeikia. Ketemiteyurieki pita yuriki tepitanaki'erieka.

¹⁹ Mipai tekatenimaikakuni tita yuri mirainetsie temimemeteki, Kakaiyari hixie mipai ta'iyari tepitenitiaka:

²⁰ xika ta'iyari tatsi'utate'ani tita ta'iyari mikatimate hepaitsita, Kakaiyari pita matsi kanimariweni keyuri ta'iyari meta naime katinimaika.

²¹ Nenaki'erima, ta'iyari xika katatsi'utatieni, 'aixia tepitemaika Kakaiyari hixie,

²² meta naime tita temite'itawawiriwa pitatiyetuiiriwa yatemitekahuki kemiti'aita meta tita mitinake yatemiteyurieki.

²³ 'Ipa katini'aitani: yuri temiteta'erieniki kemi'ane Kakaiyari nu'aya mihikitsie Ketsutsi Kirititsu hetsie, temitanaki'eriekaki tanaiti miki kemitatu'aita.

²⁴ Kemi'ane yamitikamie kemiti'aita, Kakaiyari hetsie tiwiyati puyuhayewa, Kakaiyari meta hetsiena tiwiyati kaniyuhayewamiki. 'Ipa tekatenimaika tahetsie tiwiyati muyuhayewa, yu'iyari

mitatsi'umiki.

4

Tyari hetsie xetewiyati xekeneu'uwani

¹ Nenaki'erima yunaime 'iyarite yuri xepikatewa'eririeka, matsi xekeniwaruta'iniata 'iyarite tsiparatsi xika Kakaiyari hetsia memiemetetini, yumireti Kakaiyari niukametemama meyuxatati mekaneutayeixiani kwiepa.

² 'Ipa xepiteheitimani Kakaiyari 'Iyarieya: Yunaiti 'iyarite memitehekiata Ketsutsi Kiritsitu kename tewititi hikitikai, miki Kakaiyari hetsia mekanimiemetetini.

³ Yunaiti 'iyarite Ketsutsi memikahekiata miki Kakaiyari hetsia mepikamietete, matsi Kiritsitu memaye'unie hetsia mekanimiemetetini. Xeme xepu'enana kename miki 'uhamie, hikiri kwiepa kaniuyeikani.

⁴ Neniwema, xeme Kakaiyari hetsia xekanimiemetetini meta Kakaiyari niukametemama memuyuxata xekaniwara'iwa, miki xehetsie mitiwiya kanitirikaïyeni keyuri miki kwiepa memitama wahetsie mitiwiya.

⁵ Miki kwiepa mekanimiemetetini, 'ayumieme kwiepa mieme mekatenikuxatani meta kwiepa memitama mekaniwa'enieka.

⁶ Tametsi Kakaiyari hetsia tekanimiemetetini, kemi'ane Kakaiyari mimate katani'enieka, kemi'ane Kakaiyari mikamate pikatatsi'enie. 'Ikiki tepiwamate 'iyari yuri maine meta 'iyari mitiyu'itaiya.

Kakaiyari katiniyukanaki'erieka

7 Kamitsi nenaki'erima, tepitanaki'erieka tanaiti, naki'eriya Kakaiyari hetsia kanimemetini, yunaiti memiteyukanaki'erie Kakaiyari hetsie mekaniyenuiwa, Kakaiyari mekanimateni.

8 Kemi'ane mikatiyukanaki'erie Kakaiyari pikahetimaiwe, Kakaiyari mitiyukanaki'erieki.

9 'Ikiki tahetsie matsiikiti kanayani Kakaiyari kemitatinaki'erie, Kakaiyari yuniwe muyuxewi meyen'aki kwiepa, mikiki temayeneniereniki.

10 Mipai kani'aneni naki'eriya: Tameri tepika'inaki'eriekai Kakaiyari, miki pita pitatsinaki'eriekai, yuniwe kaneyen'ani mawari mayaniki temiteheuyehiwiyarieniki tita 'axatemite'uyuri.

11 Nenaki'erima Kakaiyari xika mipai tatinaki'eriekaitini, kaneuyeweka tameta mipai temitetanaki'eriekaki tanaiti.

12 Xewiti pika'ixeyawe Kakaiyari hatsuaku, xika tetanaki'erieka tanaiti, Kakaiyari tahetsie tiwiyati kaniyuhayewa, miki kemitiyukanaki'erie, naki'eriya kanimatsiikini tahetsie.

13 'Ipa tepitemate hetsiena temitewiya mikirita tahetsie mitiwiya, yu'iyari mitatsi'umiki taxexuime.

14 Tame tepunenierixi tekatenihekiatani ta'ukiyari yuniwe meyen'aki kwiepa memitama wawikweitsitiwame.

15 Kemi'ane miyuhekiata mipai 'utaiti kename Ketsutsi Kakaiyari nu'aya hiki, Kakaiyari hetsiena tiwiyati kaniyuhayewa, mikita Kakaiyari hetsie tiwiyati puyuhayewa.

16 Tame tekatenetimani kemitatinaki'erie

Kakaiyari, yuri teteniuta'erien naki'eriyayatsie kemitatinaki'erie.

Kakaiyari katiniyukanaki'erieka. Kemi'ane tiyukanaki'erieti muyuhayewa, miki Kakaiyaritsie tiwiyati kaniyuhayewamiki, Kakaiyari meta hetsiena tiwiyati puyuhayewa.

¹⁷ Naki'eriya mipai katinaye'ani tahetsie 'aixia temitetamaikaki miki tukaritsie kepauka 'itsikame mitatsita'iniata, hepaina temi'aneneki tame 'ena kwiepa miki mi'ane hepai.

¹⁸ Xika tiyukanaki'erieka marika pikaxiawe. Naki'eriya 'aixia mi'ane marika payeweweiya. Kemi'ane mima kani'uximatiarieka, kemi'ane mima pika'aye'awe tiyukanaki'erieti.

¹⁹ Tame tepitetakanaki'erie miki meri mitatsi'utanaki'eriki.

²⁰ Xika xewiti ya'utayini: «Ne Kakaiyari nepinaki'erie» haiti, peru xika yu'iwa 'uxieka, miki katini'itawani. Kemi'ane yu'iwa xeyati mika'inaki'erie, pikayiwe Kakaiyari minaki'erieka mika'ixeyawe.

²¹ Miki 'iki 'aitsika kataniyetuirieni hetsiana mimieme: kemi'ane Kakaiyari minaki'erie, yu'iwata kenaki'erieka.

5

Yuri ti'eriet, tita kwiepa mitimieme pira'iwa

¹ Yunaiti yuri memite'erie Ketsutsi kename Kirititsu hiki heitserie mupitiarie Kakaiyari hetsie mekaniyekine, kemi'ane miki 'ukiyarieya minaki'erie, niwemamata kaniwanaki'erieka.

² Tame 'ipai tepitemate Kakaiyari niwe-mama temiwanaki'erie, kepauka Kakaiyari teminaki'erie, kepauka yatemitekahu kemiti'aita.

³ 'Ipai tekateniyurieka xika Kakaiyari tenaki'erieka: yatepitekahuni kemiti'aita. 'Aitsikaya pikahahete,

⁴ naiti Kakaiyari hetsie miyetia kwiepa mieme katina'iwani. Tita yuri temite'erie, miki kanihikitini tita 'ari mire'iwa kwiepa timieme.

⁵ ¿Kepaiki pihiki kwiepa mieme ma'iwarime? 'Ikiri pihiki, kemi'ane yuri miti'erie kename Ketsutsi Kakaiyari nu'aya hiki.

⁶ 'Iki Ketsutsi Kiritsitu kanihikitini kemi'ane haa xuriya 'iniariyari munua, haa 'iniariyari hexeiyati xeikia pikanua, matsi haa xuriya 'iniariyari hexeiyati punua. 'Iyari mipai katinihekiatanita, 'Iyari yuri maine.

⁷ Mepiyuhaika memitehekiata taheima, Ta'ukiyari, Nu'aya, 'Iyarieya Mitiyupata mepihime. 'Iki yuhaikati mekaniyuxewini.*

⁸ Mepiyuhaika memitehekiata kwiepa: Kakaiyari 'Iyarieya, haa, meta xuriya. Yuhaikati 'axeikia mepitehekiata.

⁹ Teiteri kememitehekiata tekaniwa'enieka, merikite, Kakaiyari kemitihekiata matsi kaniheitserietini, 'ipai katinihekiatani Kakaiyari, yuniwe hepaitsita katiniutahekiata.

¹⁰ Kemi'ane yuri miti'erie Kakaiyari Nu'ayatsie miki kemitiutahekiataxi pexeiya yuhetsie.

* **5:7 5:7** KiriyeKutsie Mepiyuhaika memitehekiata taheima, Ta'ukiyari, Nu'aya, 'Iyarieya Mitiyupata mepihime pikaheki. KiriyeKutsie Yuhaikati 'axeikia mepitehekiata. paine.

Kemi'ane Kakaiyari yuri mikati'eririe, miki Kakaiyari ti'itawame kanayeitiwani, yuri mikatiuta'eriki kemitiutahekiataxi Kakaiyari yuniwe hepaitsita.

¹¹ Mipai paine tita mitihekiata: Kakaiyari katanipitiani tukari mikaxiwe, nu'ayatsie kanixuaweni miki tukari.

¹² Kemi'ane nu'aya mexeiya, tukari pexeiya, kemi'ane Kakaiyari Nu'aya mikahexeiya, tukari pikahexeiya.

Xepitemate tukari mikaxiwe xemexeiya

¹³ Tki nepitixe'uti'utiiri xeme yuri xemite'erie kemi'ane Kakaiyari nu'aya mihikitsie, xemitemaikaki tukari mikaxiwe xepexeiya.

¹⁴ Tpai 'aixia tepitetamate hixiena: Xika tixaiti tete'itawawirieni kemitinake, pitatsi'enie.

¹⁵ Miki meta, xika mipai tetemaika mitatsi'enie tita temite'iwawirie, tepitemate 'ari temeixeiya tita temite'iwawirie.

¹⁶ Xika xewiti 'ixeiya yu'iwa 'axatiyurieneme kemikatimini, kanitawawiriemiki yu'iwatsie mieme, miki Kakaiyari tukari kanipitiamiki. Tita 'axamiti'ane nekanixatani 'axaxikatiuyurieni mika'uminiki. Kanixuaweni xewiti miminiki xika 'axatiuyurieni, mikitsie mieme xemitawawirieniki 'atsinepikahaine.

¹⁷ Naiti mikatiheitserie 'axakani'aneneni, peru tita 'axamiti'ane puxuawe 'axaxikatiuyurieni mikaminiki.

¹⁸ Tame tepitemate yunaiti Kakaiyaritsie memiyeki 'axamepikateyurie: Ketsutsi Kiritsitu Kakaiyaritsie miyetia kaniwa'iwiyani, meta 'axamitiyuriene pikawamayia.

¹⁹ Tepitemate Kakaiyari teminiwemama, meta naiti kwiepa mitimieme 'axamitiyuriene hetsie ti-wiyati 'apuwe.

²⁰ Tepitemateta Kakaiyari nu'aya munua, mitatsi'enatia temimaikaki miki muyuri Kakaiyari. Tame miki muyuritsie tepitewiya nu'ayatsie Ketsutsi Kiritsitu hetsie. Miki yuriki kanikakaiyaritini, tukari mikaxiwe kanihikitini.

²¹ Neniwema, xekeneyukweriwayurieka kakaiyarixi wahepaitsita.

**KAKAFYARI NIUKIEYA XAPAYARI
WIXARIKAKI**
**The Holy Bible in the in Huichol language of Mexico,
2020 edition**
**La Santa Biblia en lengua huichol de México, edición
2020**

copyright © 2020 Wycliffe Bible Translators, Inc.

Language: Huichol

Translation by: Wycliffe Bible Translators, Inc.

Huichol [hch], Mexico

Copyright Information

© 1988-2020, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Holy Bible

in Huichol

© 1988-2020, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-09-03

PDF generated using Haiola and XeLaTeX on 6 Sep 2025 from source files dated 4 Sep 2025

79690d81-fd4b-51b4-a3a6-712e0fddaca3